

आकाशवाणी

खबरां शिवि सूरि कोला

- पोलैंड दे उप विदेश मंत्री होरें रूसी राष्ट्रपति व्लादिमीर पुतिन होरें'गी रूस-यूक्रेन बश्कार चला'रदी तनोतनी च सामरिक परमाणु हथियारें दा इस्तेमाल नेई करने लेई राजी करने दी भूमिका निभाने च प्रधानमंत्री नरेंद्र मोदी होरें'गी श्रेय दित्ता।
- प्रधानमंत्री नरेंद्र मोदी होरें आखेआ जे महाकुम्भ उभरदे भारत दी भावना गी दस्सने ते विविधता च एकता गै भारत दी विशेषता ऐ।
- विदेश मंत्री एस. जयशंकर होरें निरपक्ख ते मजबूत अंतरराष्ट्रीय बवस्था दी जरूरतै दा आह्वान कीता।
- रेलवे नै पिछले 10 बरें च 5 लक्ख नौकरियां दित्तियां, 1 लक्ख शा मती नौकरियें लेई भर्ती प्रक्रिया जारी, आखेआ रेल मंत्री अश्विनी वैष्णव होरें।
- 9 म्हीनें शा मते समें थ्मां अंतरराष्ट्रीय अंतरिक्ष स्टेशन च फंसे दे अंतरिक्ष यात्री धरतै पर वापस परती औडन।
- गजा पर इज्राइल ब्हाई हमले च मरौने आहलें दी गिनतरी बदियै 400 तोड़ी पुज्जी गेई ऐ।

<><><><><><>

Poland-PM Modi

पोलैंड दे उपविदेश मंत्री व्लादिस्लाव टेओफिल बाटोस्जेव्स्की होरें आखेआ ऐ जे प्रधानमंत्री नरेंद्र मोदी हुंदी रूसी राष्ट्रपति व्लादिमीर पुतिन होरें गी रूस-यूक्रेन बश्कार चलारदी तनोतनी च सामरिक

परमाणु हथियारें दा इस्तेमाल नेई करने लेई राजी करने दी भूमिका नभाने च प्रधानमंत्री नरेंद्र मोदी होरेंगी श्रेय दित्ता। मीडिया कन्नै गल्ल करदे होई श्री व्लादिस्लाव टेओफिल बार्टोस्जेव्स्की होरें प्रधानमंत्री नरेंद्र मोदी हुंदे प्रयासें दी सराहना कीती ते वैश्विक शांति दे प्रयासें लेई भारत दा इक मुख सलाह-सफाई कराने आहले दे तौरा पर इक मुख भूमिका निभाने दे बारै लो बी पाई। उनें आखेआ जे प्रधानमंत्री मोदी होरें रूस दे राष्ट्रपति श्री पुतिन होरेंगी परमाणु हथियार इस्तेमाल नेई करने पर राजी कीता। श्री बार्टोस्जेव्स्की होरें भारत दे रूस कन्नै रिश्ते अगगे बदा'रदे न ते राष्ट्रपति पुतिन होरें इस रिश्ते गी खास हक आहला दस्सेआ ऐ। उनें युद्ध दौरान प्रधानमंत्री मोदी हुंदे यूक्रेन दौरे गी चेत्ता कीता ते उन्दे दौरे कन्नै भारत दे रूख ते शांति लेई बचनबद्धता गी मजबूती देने आहला दस्सेआ। श्री बार्टोस्जेव्स्की होरें भारत दे आपरेशन गंगा, आपरेशन देवी शक्ति ते आपरेशन कावेरी दी बी तरीफ कीती जिस राएं भारत दी वैश्विक स्थिरता बक्खी बी बचनबद्धता गी सामने रक्खेआ ऐ।

<><><><><><>

PM-Mahakumbh

प्रधानमंत्री नरेंद्र मोदी होरें अज्ज आखेआ ऐ जे प्रयागराज च आयोजित महाकुम्भ नै उभरदे भारत दी भावना गी दस्सेआ ऐ ते पूरे विश्व नै देश दी शक्ति गी दिक्खेआ ऐ। उनें आखेआ जे विविधता च एकता भारत दी विशेषता ऐ जिसी हाल च गै सम्पन्न महाकुम्भ दौरान अनुभव कीता गेआ। महाकुम्भ पर लोकसभा च बयान दिंदे होई श्री मोदी होरें आखेआ जे जिसलै पूरा विश्व चुनौतीपूर्ण समें चा लंगारदा ऐ, मगरा इस एकता दा भव्य प्रदर्शन देश दी सभ्भनें शा बड्डी ताकत ऐ। उनें विविधता च एकता दी इस विशेषता गी समृद्ध करने दी जरूरता पर लो पाई। उनें आखेआ जे नमी पीढी गी जल संरक्षण दा महत्व सखाना लोडचदा ऐ। प्रधानमंत्री होरें आखेआ जे भारत च कई नदियां न जिदे चा किश लुप्त होने दे कौल काल ना। उनें महाकुम्भ थमां प्रेरणा लैंदे होई उत्सव दा विस्तार करने दी जरूरता पर बल दित्ता। उनें प्रयागराज महाकुम्भ दी सफलता च योगदान देने आहले लोकें दी सराहना करदे होई आखेआ जे इस ऐतिहासिक आयोजन नै देशवासियें गी मती प्रेरणा दित्ती ऐ कीजे एहदा नेतृत्व लोकें गै कीता ऐ।

<><><><><><>

PM-Special Olympics

प्रधानमंत्री नरेंद्र मोदी होरें अज्ज इटली दे ट्यूरिन च विशेष ओलंपिक विश्व सयालू खेड्डें च हिस्सा लैने आहले भारतीय दल कन्नै मुलाकात कीती ते उन्दे प्रदर्शन दी सराहना कीती। इक सोशल मीडिया पोस्ट च प्रधानमंत्री होरें आखेआ जे उनेंगी भारतीय दल पर गर्व ऐ जिन्नै विशेष ओलंपिक च 33 तगमे जित्तियै देश दा ना रोशन कीता। श्री मोदी होरें दल गी उन्दी उपलब्धियें लेई ममारखां बी दित्तियां।

<><><><><><>

EAM-POK

विदेश मंत्री डॉ. एस. जयशंकर होरें रायसीना डायलाग-2025 च बोलदे होई इक्क निरपक्ख ते निगगर अंतरराष्ट्री बवस्थ दी लोड़ पर जोर दित्ता ऐ। कश्मीर पर पाकिस्तान दे नजैज कब्जे दे कन्नै भारत दे अनुभव पर लोऽ पांदे होई उनें इसी दुए विश्व युद्ध दे परेंत कुसै खेत्तर पर सब्भनें शा लम्मे समें तगर चलने आहले गैर कनूनी कब्जा दस्सेआ। उनें आखेआ जे जदू के भारत नै संयुक्त राष्ट्र दे राहें समाधान दी मंग कीती, पर जेहड़ा इक्क हमला हा उसी विवाद दे रूपा च पेश कीता गेआ। विदेश मंत्री होरें इक्क निगगर ते निरपक्ख संयुक्त राष्ट्र दा आह्वान कीता। उनें इस गल्लै पर जोर दितता जे स्थाई शांति गी सुनिश्चित करने ते सम्प्रभुता गी कायम रखने लेई वैश्विक मानदंडें गी बराबर रूप कन्नै लागू कीता जाना चाइदा।

<><><><><><>

LS-Railways Discussion

रेलवे नै पिछले 10 बरें च 5 लक्ख नौकरियां दित्तियां न ते 1 लक्ख शा मती नौकरियें लेई भर्ती प्रक्रिया चलारदी ऐ। रेल मंत्री अश्विनी वैष्णव होरें आखेआ जे भारतीय रेलवे बेहतर माली हालात च ऐ ते सरकार इसी होर बेहतर बनाने लेई कम्म करारदी ऐ। श्री वैष्णव होरें रेल मंत्रालय दे कम्मकाज

पर लोकसभा च चर्चा दा जवाब दिंदे होई अज्ज एहू गल्ल आक्खी। उनें आखेआ जे देश च 2020 थमां यात्री किराए च कोई बढोत्तरी नेई कीती गई ऐ ते एहू होरनें देशें दे मकाबले च काफी किफायती ऐ। श्री वैष्णव होरें आखेआ जे कई तकनीकी बदलाव कीते गेन ते भारतीय रेलवे लम्मी रेल, इलेक्ट्रानिक इंटरलार्किंग ते कोहरे नै सुरक्षा उपकरणें जनेई बड्डियां गैं पुट्टिये अपनी सेवाएं च लगातार सुधार करारदा ऐ।

<><><><><><>

ED-Searches

ई.डी गैर सरकारी संगठनें, (NGO) सोरोस आर्थिक विकास कोष (EDF) ते ओपन सोसायटी फाउंडेशन (OSF) आसेआ विदेश मुद्रा प्रबंधन अधिनियम उल्लंघन दी जांच लेई बेंगलुरू च 8 परिसरें च (FEMA) तपाशी अभियान चलावदी ऐं निदेशालय नै खुलासा कीता ऐ जे सोरोस गी 2016 च गृह मंत्रालय नै जांच दे दायरे च हा, इसी भारत च गैर सरकारी संगठनें गी अनियमित दान देने थमां रोक दीता गेआ हा। निदेशालय नै आखेआ जे इस पैहे दा इस्तेमाल एनजीओ दी गतिविधियें गी पैहा देने लेई कीता गेआ हा जेडा .. दा उल्लंघन ऐ। ई.डी सोरोस, ई.डी.एफ ते ओ.एस.एफ आसेआ लाए गेदे होरनें एफ.डी.आई फंडें दी बी जांच करारदा ऐ।

<><><><><><>

RBI-MOU

भारतीय रिजर्व बैंक ते बैंक ऑफ मारीशस बश्कार इक समझौता जापन पर दस्तखत कीते गेन जिसदे तैहत बन्ने पर लैन-देन लेई मकामी करंसी गी बढावा दित्ता जाग। आरबीआई दे मताबक इस समझौते दा मकसद दक्खी बपार च भारतीय रुपे ते मारीशस दे रुपे दे इस्तेमाल च सुविधा होग। एहदे कनै सब्बै नागरिकें गी अपने-अपने देश दी करंसी च अदायगी करने च सुविधा होग। दौनें देशें बश्कार ऐतिहासिक, सांस्कृतिक ते आर्थिक सरबन्ध बी मजबूत होंगन।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एहू 120मीं किशत होग। कार्यक्रम च शामिल करने लेई लोक अपने बचार ते सुझाहू 28 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एहू कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>

NASA- Return

अमरीका दे अंतरिक्ष सरबन्धी नासा नै घोषणा कीती ऐ जे 9 म्हीने शा मते समें थमां अंतरराष्ट्रीय अंतरिक्ष स्टेशन पर फसे दे बुच विल्मोर ते सुनीता विलियम्स होर अज्ज रातीं धरतै पर परती औंगन। ड्रैगन अंतरिक्ष यान कल बडुलै 3 बज्जियै 27 मिनटें पर धरतै पर उतरोग। इक आधिकारिक बयान च अंतरिक्ष एजेंसी नै आखेआ जे अंतरराष्ट्रीय अंतरिक्ष स्टेशन थमं कू-9 मिशन दी वापसी लेई हालात अनुकूल न। अंतरिक्ष यात्रियों दी फ्लोरिडा तट शा दूर समुंद्र च उतरने दी मेद ऐ।

<><><><><><>

Israel-Air Strikes

कल राती तोड़ी गजा पर इज्राइल ब्हाई हमले च मरोने आहलें दी गिनतरी बदियै 400 होई गेई ऐ। फिलीस्तीनी स्वास्थ्य अधिकारियें दस्सेआ जे इस हमले च 500 शा मते लोक जख्मीं होई गेन। एह नमा हमला इज्राइल ते हमास बश्कार संघर्ष विराम वार्ता दे असफल होने दे बाद होआ ऐ। इज्राइल दी फौज दा आखना ऐ जे एह युद्धविराम गी होर बदाने दी गल्लबात दी असफलता दे बाद उनें हवाई हमला कीता ऐ। प्रधानमंत्री बेंजामिन नेतनयाहू हुंदे दफ्तरै नै हमास पर बंधकें गी रिहा नेई कीते जाने ते युद्ध विराम बदाए जाने दे प्रस्तावें गी असफल करने दा आरोप लाया। फिलीस्तीनी गुट हमास कोल अजें बी 59 बंधी न। उनें 7 अक्तूबर 2023 दे हमले दौरान 250 लोकें गी बंधक बनाया हा। सुलाह सफाई कराने आहले दल दे इक सदस्य मिस्र नै सब्बै पखें थमां यंसम बनाए रखने दा आह्वान करदे होई आखेआ जे ओहू स्थाई समझौते लेई गल्लबात जारी रक्खन।

<><><><><><>

Tusli-Raisina

अमरीका दी राश्ट्रीय खूफिया निदेश तुलसी गबार्ड होरें सादे लेई प्रधानमंत्री नरेंद्र मोदी हुंदे प्रति आभार व्यक्त कीता ते अपनी जात्तरा दौरान होई दी रचनात्मक चर्चाएं दा जिक्र कीता। अज्ज रायसीना वार्ता च अपने संबोधन च सुश्री गबार्ड होरें आखेआ जे पिछले किश दिनें च अपने भारतीय हमरूतबा कन्नै गल्लबात करना ते पिछले म्हीने वाशिंगटन डी.सी च राष्ट्रपति ट्रम्प ते श्री मोदी हुंदे सांझे बयान थमां पैदा होई दी गति गी अगगे बदाना मता गै रचनात्मक रेआ।

<><><><><><>

IED-Shopian

शोपियां जिले दे हबदीपोरा इलाके च अज्ज इक आई.ई.डी दा समेंसिर पता लग्गी जाने नै कुसै बड्डी माड़ी घटना कोला बचाऽ होई गेआ ऐ। आई.ई.डी दा पता लगदे गै बम्ब नकारा करने आहले दस्ते गी दस्सेआ गेआ जिन्नै तुरत इसी बेल्ला रौहंदे नकारा करी दित्त। पिछले 2 दिनें दौरान एहू इस चाल्ली दी दुई घटना ऐ। एहदे शा पैहले कल संगारें बी कुलगाम च इससै चाल्ली इक आई.ई.डी दा पता लाइयै उसी नकारा करी दित्त गेआ हा।

JJM-JK LS

लोकसभा च अज्ज पेश कीते गेदे आंकड़ें मूजब जम्मू-कश्मीर केंद्र शासित प्रदेश च जल जीवन मिशन तैहत 81 इशारिया 0-6 प्रतिशत घरें च नलके राएं पीने आहला पानी पुजजा करदा ऐ। एहू आंकड़े केंद्र शासित प्रदेश दे ग्रामीण इलाकें देन जिसलै जे राश्ट्रीय सतह पर ग्रामीण इलाकें च नलके राएं पानी 79द इशारिया 9-1 प्रतिशत घरें तगर पुज्जै करदा ऐ। बारामूला थमां सांसद शेख रशीद हुंदे आसेआ अज्ज लोकसभा च पुच्छे गेदे इक सोआलै दा परता दिंदे होई जलशक्ति राज्यमंत्री वी. सोमन्ना होरें दस्सेआ जे अगसत 2019 च जलशक्ति मिशन दे शुरू होने कोला लेइयै हुनै तगर 9 लख 84 जहार नमें परिवारें गी घरें च पीने लेई नलके राएं पानी उपलब्ध कराया गेआ ऐ। उनें दस्सेआ जे गांदरबल ते श्रीनगर जिलें च हर इक घरै तगर पीने आहला पानी नलके राएं पुज्जा करदा ऐ जिसलै जे अनंतनाग, शोपियां, रियासी ते बडगाम जिलें च बी ग्रामीण इलाकें च खरी मती गिनतरी च पीने आहला पानी, होर नमें परिवारें तगर पुज्जा ऐ। मंत्री होरें दस्सेआ जे इन्दे मकाबले च किश जिलें अजे पिच्छे बी ऐन जित्थे ग्रामीण इलाकें च सारे घरें तगर पानी नलके राएं नेही पुज्जा। जम्मू जिले दे ग्रामीण इलाकें च 66 इशारिया 4 प्रतिशत, राजौरी च 65 इशारिया 9-8 प्रतिशत ते साम्बा जिले च 67 इशारिया 3-7 प्रतिशत, अजेंकि पिछले 4 बरें च इस कम्मै लेई सुद्दे फंड बी उपलब्ध होए ना।

Train-Service JK

केंद्री रेल मंत्री अश्विनी वैष्णव होरें अज्ज लोकसभा च घोषणा कीती जे तौले गै जम्मू गी रेल गड्डी राहें श्रीनगर कन्नै जोड़ी दित्ता जागं वैष्णव होरें अपने संबोधन च आखेआ जे उनेंगी जम्मू गी रेल गड्डी राहें श्रीनगर कन्नै जोड़ने दे लम्मे चिरै थमां दिक्खे जा'रदे ख्वाब गी पूरा करने पर बड़ा गै गर्व मसूस होआ करदा ऐ। उनें आखेआ जे एहू रेल सेवा तौले गै शुरू होई जाह्ग ते रेलवे सुरक्षा दे मुख आयुक्त दियें अखीरी सफारिशें गी लागू कीता जाग। वैष्णव होरें जोर देइयै आखेआ जे इक्क बारी जिसलै सफारिशां

लागू करने दी प्रक्रिया सबूरी होई जंदी ऐ ते फी रेलवे सुरक्षा दे मुख आयुक्त हरी झंडी देई दिंदे न तां
फी जम्मू थमां श्रीनगर तगर रेल सेवा शुरू होई जाग। उनें आखेआ जे एहदे कन्नै लोकें आस्तै संपर्क ते
सुविधा बधी जाग।

<><><><><><>